

BAB 11

PENDUDUK DAN PETEMPATAN DI ASIA TENGGARA



Asia Tenggara meliputi kawasan seluas 4 506 600 km² dan terletak di benua terbesar di dunia, iaitu Benua Asia. Berapakah bilangan penduduk di Asia Tenggara? Di manakah kawasan yang menjadi petempatan utama penduduknya?




Standard Pembelajaran

Pada akhir pengajaran dan pembelajaran murid dapat:

- Menjelaskan dengan contoh taburan penduduk di Asia Tenggara.
- Mengetahui fungsi petempatan bandar utama di Asia Tenggara.

1. Taburan penduduk di Asia Tenggara



Di manakah kawasan yang menjadi tumpuan penduduk di Asia Tenggara?

2. Fungsi petempatan bandar utama

Apakah hubung kait antara taburan penduduk dengan fungsi petempatan bandar utama di Asia Tenggara?



EKSPLORASI BAB



Singapura



Jakarta, Indonesia



Bangkok, Thailand



Manila, Filipina



Kuala Lumpur, Malaysia




11.1

TABURAN PENDUDUK ASIA TENGGARA

Taburan penduduk merujuk kepada sebaran penduduk di sesuatu kawasan di muka bumi. Taburan penduduk di Asia Tenggara adalah berbeza-beza mengikut kawasan. Peta 11.1 menunjukkan taburan penduduk di Asia Tenggara.

Glosari

Populasi: Jumlah orang yang mendiami sesuatu tempat (negara, negeri, daerah)



Peta 11.1 Taburan penduduk di Asia Tenggara

Sumber: Spatialworks Sdn. Bhd.



Penduduk di Asia Tenggara dianggarkan melebihi 640 juta orang (sehingga Jun 2016). Angka tersebut bersamaan 8.62% daripada keseluruhan **populasi** penduduk dunia. Rajah 11.1 menunjukkan anggaran jumlah penduduk negara-negara di Asia Tenggara sehingga Jun 2016.



Rajah 11.1 Anggaran jumlah penduduk mengikut negara di Asia Tenggara sehingga Jun 2016
 Sumber: <http://www.worldometers.info/world-population/population-by-country/>

Taburan penduduk di Asia Tenggara terbahagi kepada tiga, iaitu padat, sederhana dan jarang.



11.2

FUNGSI-FUNGSI PETEMPATAN BANDAR UTAMA DI ASIA TENGGARA

Bandar-bandar utama di Asia Tenggara seperti Kuala Lumpur, Jakarta, Manila, Bangkok dan Singapura mempunyai fungsi-fungsi tertentu seperti yang berikut:

Ibu Negara dan Pusat Pentadbiran

- Kebanyakan bandar utama di Asia Tenggara merupakan ibu negara dan berfungsi sebagai pusat pentadbiran.
- Sebagai contoh, Jakarta (Indonesia), Bangkok (Thailand) dan Manila (Filipina).



Bangunan Parlimen, Manila

Pusat Perdagangan

- Terdapat pusat perniagaan, gedung beli-belah dan aktiviti import dan eksport di bandar utama.
- Sebagai contoh, Bandung dan Surabaya (Indonesia), Johor Bahru (Johor) dan Orchard Road (Singapura).



Pusat beli-belah di Bandung, Indonesia



Aktiviti

- Objektif:** Mengenal pasti fungsi petempatan bandar di Asia Tenggara dalam bentuk multimedia
- Bahan:** ICT, grafik (visual, audio, video, keratan akhbar, majalah dan media massa).
- Kaedah:**
1. Buat rujukan Internet.
 2. Kumpul gambar dan maklumat berkaitan.
 3. Hasilkan buku skrap.
 4. Pamerkan hasil tugasan di sudut mata pelajaran kelas anda.



Pusat Pelancongan

- Bandar utama di Asia Tenggara menjadi daya tarikan pelancong.
- Pelancong datang setiap tahun untuk melawat dan menikmati panorama bandar setiap negara di Asia Tenggara.
- Sebagai contoh, Kuala Lumpur (Malaysia), Jakarta (Indonesia) dan Bangkok (Thailand)



Pasar terapung di Bangkok, Thailand

Pusat Perindustrian



Kilang pemasangan kereta di Manila, Filipina

- Perindustrian merupakan sektor sekunder yang penting dalam pembangunan ekonomi negara di Asia Tenggara.
- Bandar utama merupakan pusat perindustrian bagi setiap negara di Asia Tenggara.
- Sebagai contoh, Manila (Filipina) terkenal dengan industri pemasangan kenderaan bermotor dan besi keluli, Bangkok (Thailand) terkenal dengan industri elektrik dan elektronik serta industri makanan.

Pusat Perhubungan dan Pengangkutan

- Pusat perhubungan dan pengangkutan terletak di bandar utama di Asia Tenggara.
- Sebagai contoh, pusat pengangkutan yang terdapat di bandar utama ialah Lapangan Terbang Antarabangsa Soekarno-Hatta di Jakarta (Indonesia) dan Lapangan Terbang Antarabangsa Kuala Lumpur (Malaysia).
- Bandar utama di Asia Tenggara juga mempunyai rangkaian Internet dan telekomunikasi yang lengkap.



Lapangan Terbang Antarabangsa Kuala Lumpur (KLIA)



Lima Bandar Utama di Asia Tenggara

Peta 11.2 menunjukkan lima petempatan bandar utama di Asia Tenggara serta jumlah penduduk dan fungsinya. Petempatan bandar utama ini mempunyai penduduk yang padat.



Bangkok (Thailand)

- Jumlah penduduk 9.44 juta orang (2016)
- Terletak di sebelah timur tebing Menam Chao Phraya
- Ibu negara Thailand
- Pusat kegiatan ekonomi Thailand
- Berfungsi sebagai sebuah pelabuhan
- Terkenal dengan julukan 'Venice Timur'

Kuala Lumpur (Malaysia)

- Jumlah penduduk 1.76 juta orang (2016)
- Terletak di pertemuan Sungai Klang dengan Sungai Gombak
- Ibu negara Malaysia
- Pusat perindustrian dan perdagangan, pusat pendidikan
- Bandar **metropolitan** terbesar di Malaysia



Jakarta (Indonesia)

- Jumlah penduduk 10.4 juta orang (2016)
- Terletak di muara Sungai Tjiliwung di Pulau Jawa
- Pusat kegiatan ekonomi, pusat pendidikan dan pusat perdagangan
- Bandar metropolitan terbesar di Indonesia



Peta 11.2 Petempatan lima bandar utama di Asia Tenggara
Sumber: Spatialworks Sdn. Bhd.





Singapura

- Jumlah penduduk 5.70 juta orang (2016)
- Terletak di selatan Semenanjung Malaysia dipisahkan oleh Selat Tebrau
- Pusat kewangan dan perdagangan antarabangsa
- Antara pelabuhan terpenting didunia
- Bandar raya metropolitan



Glosari

- Metropolitan:** Terdiri daripada bandar raya dan kawasan pinggir bandar
- Kosmopolitan:** Terdiri daripada orang atau unsur-unsur dari seluruh dunia, bersifat sejagat

Manila (Filipina)

- Jumlah penduduk 13.1 juta orang (2016)
- Ibu negara Filipina
- Terletak di timur Teluk Manila di Pulau Luzon
- Pusat kegiatan ekonomi utama Filipina
- Merupakan bandar raya **kosmopolitan**





IMBAS KEMBALI

Penduduk Asia Tenggara

Taburan Penduduk di Asia Tenggara

padat

sederhana

jarang



Info
GEOGRAFI

Kira-kira 60 peratus penduduk Indonesia tinggal di Pulau Jawa. Untuk mengurangkan kepadatan penduduk di Pulau Jawa, kerajaan Indonesia terpaksa menjalankan program 'transmigrasi' bagi memindahkan penduduk ke pulau-pulau lain.

Sumber: <http://eravisi.com/geo/tg1/ms030>

Jumlah Penduduk di Asia Tenggara

640 863 401 orang
(Anggaran sehingga Jun 2016)

Fungsi Bandar Utama

- Ibu negara dan pentadbiran
- Pusat perdagangan dan pemiagaan
- Pusat perindustrian
- Pusat pelancongan
- Pusat perhubungan dan pengangkutan



Bijak
IT

Melalui laman web, kumpulkan maklumat tentang lima bandar yang lain di Asia Tenggara selain daripada Kuala Lumpur, Bangkok, Jakarta, Manila dan Singapura. Dapatkan jumlah penduduk dan fungsi bandar tersebut. Bentangkan hasil dapatan anda kepada rakan sekelas.



Jumlah penduduk:

Kuala Lumpur: 1.76 juta orang (2016)

Sumber: Jabatan Perangkaan Malaysia

Jakarta: 10.4 juta orang (2016)

Sumber: World Population Review

Taburan penduduk di Asia Tenggara padat di kawasan-kawasan bandar utama. Kepadatan taburan penduduk akan terus berlaku tahun demi tahun dan boleh mendatangkan kesan negatif. Nyatakan kesan akibat taburan penduduk yang terlalu padat serta berikan cadangan untuk mengatasinya.





Cabaran Prestasi

A. Isi tempat kosong dengan jawapan yang betul.

- (i). Negara yang paling ramai penduduk di Asia Tenggara ialah _____.
- (ii). Negara yang paling kurang penduduk di Asia Tenggara ialah _____.
- (iii). Pulau _____ merupakan kawasan yang paling padat penduduknya di Indonesia.
- (iv). Kawasan yang mempunyai penduduk sederhana di Malaysia termasuklah _____.
- (v). Kawasan Pergunungan Annam di Vietnam adalah berpenduduk _____.

B. Beberapa bandar raya di Asia Tenggara berpenduduk padat. Masalah utama bandar raya tersebut adalah berkaitan dengan kekurangan tanah, kesesakan kawasan petempatan dan setinggan. Mengapakah keadaan ini berlaku? 🌂

C. Malaysia menjadi tumpuan pekerja asing dari pelbagai negara. Pada pendapat anda, apakah faktor-faktor penarik yang menyebabkan perkara tersebut berlaku? 🌂



D. Nyatakan nama ibu negara bagi setiap negara di Asia Tenggara berdasarkan peta di bawah.

B1 _____

B2 _____

B3 _____

B4 _____

B5 _____

B6 _____

B7 _____

B8 _____

B9 _____

B10 _____

B11 _____



